

Ո Ր Ո Շ ՈՒ Մ թիվ 64
վարչական տույժ նշանակելու մասին

«28» փետրվարի 2022թ.

ք. Երևան

ՀՀ պետական եկամուտների կոմիտեի իրավաբանական վարչության պետ Ա. Մնացականյանս, քննելով Ղադեր Ալիզադեհեսալտեհի վերաբերյալ նյութերը՝

Պ Ա Ր Զ Ե Ց Ի՝

2021 թվականի դեկտեմբերի 2-ին ՀՀ ՊԵԿ Հարավային մաքսատուն-վարչության աշխատակիցները Մեղրիի մաքսային կետ-բաժնի տարածքում զննության են ենթարկել ՀՀ-ից ԻԻՀ մեկնող Ղադեր Ալիզադեհեսալտեհի կողմից շահագործվող «IVECO» մակնիշի, «59A301-10» հաշվառման համարանիշի բեռնատար ավտոմեքենան, ինչի արդյունքում, նշված բեռնատար ավտոմեքենայի վառելիքի և բիտումի բաքում հայտնաբերել են մաքսային հսկողությունից թաքցրած ընդհանուր՝ 116 հատ «Балтика» ապրանքանիշի գարեջուր, 207 հատ «Высший стандарт» և 34 հատ «Surprie» գրառումներով օղի, 98 հատ «РЕН 34» և 115 հատ «РЕС8-ОС» ապրանքատեսակի ռելե, 340 հատ «Тумблер» և 920 հատ «кабелная вилка» գրառումներով ապրանքներ:

Փաստի առթիվ վարորդ ԻԻՀ քաղաքացի Ղադեր Ալիզադեհեսալտեհի նկատմամբ ՀՀ մաքսային օրենսգրքի 201-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ վերոնշյալ ապրանքները, որպես իրավախախտման անմիջական օբյեկտ, վերցվել և ի պահ են հանձնվել Մեղրիի մաքսային կետ-բաժնի պահեստում:

Ղադեր Ալիզադեհեսալտեհի կողմից մաքսային հսկողությունից թաքցրած, ՀՀ մաքսային սահմանով տեղափոխված վերոնշյալ ապրանքների շուկայական արժեքը որոշելու համար 17.01.2022թ-ին նշանակվել է «Ապրանքագիտական փորձաքննություն», որի կատարումը հանձնարարվել է ՀՀ «Փորձագիտական կենտրոն» պետական ոչ առևտրային կազմակերպության փերձագետին:

ՀՀ «Փորձագիտական կենտրոն» պետական ոչ առևտրային կազմակերպության փորձագետի 08.02.2022թ. թիվ 01092210 եզրակացության համաձայն՝ փորձաքննությանը ներկայացված վերոնշյալ ապրանքների շուկայական արժեքը 2021 թվականի դեկտեմբերի 02-ի դրությամբ կարող էր կազմել 6849240 ՀՀ դրամ:

02.02.2022թ-ին որոշմամբ ԻԻՀ քաղաքացի Ղադեր Ալիզադեհեսալտեհի վերաբերյալ վարչական վարույթի ժամկետը երկարաձգվել է՝ մինչև փորձագիտական եզրակացության ստանալը:

ԵԱՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում» է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով և (կամ) նույնականացման՝ կեղծ կամ այլ ապրանքներին վերաբերող միջոցներ օգտագործելու միջոցով:

Մաքսային կարգավորման մասին օրենքի 73-րդ հոդվածի 2-րդ մասի համաձայն՝ ՀՀ սահմանով արտահանվող ապրանքի մաքսային արժեքը գործարքի գինն է, այսինքն՝ այն գումարը, որը փաստացի վճարվել է կամ պետք է վճարվեր ապրանքը արտահանելու նպատակով ձեռք բերելու և մինչև ՀՀ սահմանը տեղափոխելու համար:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 201-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի չափով:

ՀՀ մաքսային օրենսգրքի 219-րդ հոդվածի համաձայն՝ մաքսային կանոնների խախտման վերաբերյալ գործը քննվում է վարչական պատասխանատվության ենթարկվող անձի մասնակցությամբ: Գործը կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Ղադեր Ալիզադեհեսալտեհին 2022 թվականի փետրվարի 28-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 201-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի առանց իր մասնակցության, սակայն վերջինս չի ներկայացել:

Սահմանային էլեկտրոնային կառավարման տեղեկատվական համակարգի տվյալների ուսումնասիրությունից պարզվել է, որ ԻԻՀ քաղաքացի Ղադեր Ալիզադեհեսալտեհին գտնվում է ՀՀ սահմաններից դուրս:

Այսպիսով, նյութերով պարզվել է, որ 2021 թվականի դեկտեմբերի 2-ին ԻԻՀ քաղաքացի Ղադեր Ալիզադեհեսալտեհին մաքսային հսկողությունից թաքցնելով, այն է՝ բեռնատար ավտոմեքենայի վառելիքի և բիտումի բաքում տեղադրելով, ՀՀ մաքսային սահմանով տեղափոխել է 6849240 ՀՀ դրամ մաքսային արժեքով 116 հատ «Балтика» ապրանքանիշի գարեջուր, 207 հատ «Высший стандарт» և 34 հատ «Surprise» գրառումներով օղի, 98 հատ «РЕН 34» և 115 հատ «РЕС8-00» ապրանքատեսակի ռելե, 340 հատ «Тумблер» և 920 հատ «кабелная вилка» գրառումներով ապրանքներ, այսինքն՝ վերջինս թույլ է տվել ՀՀ մաքսային օրենսգրքի 201-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ արձանագրությամբ,

02"12.2021թ-ի մաքսային զննման ակտով, ՀՀ «Փորձագիտական կենտրոն» պետական ոչ առևտրային կազմակերպության փորձագետի 08.02.2022թ. թիվ 01092210 եզրակացությամբ:

Վերոգրյալի հիման վրա և ղեկավարվելով ՀՀ մաքսային օրենսգրքի 201-րդ հոդվածով, 206-րդ և 221-րդ հոդվածներով,

Ո Ր Ո Շ Ե Ց Ի՝

1. Ղադեր Ալիզադեհեսալտեհին (հասցե՝ ԻԻՀ, ք. Մայանդ, Նիազմի փողոց, տուն 3327, անձնագիր՝ B48926696) ճանաչել զանցառու ՀՀ մաքսային օրենսգրքի 201-րդ հոդվածով և նրան տուգանել թաքցնելով ՀՀ մաքսային սահմանով տեղափոխված վերոնշյալ ապրանքների մաքսային արժեքի չափով՝ 6849240 ՀՀ դրամի չափով:


/վճարումը 900005024055 հաշվեհամարին, կող՝ 19/

2. Վերցված ապրանքները կարող են վերադարձվել մաքսային ձևակերպումները կատարելուց, տուգանքի վճարումից, մաքսային վճարների և պարտավորությունների կատարումից հետո՝ մեկ աշխատանքային օրվա ընթացքում:

3. ԵԱՏՄ մաքսային օրենսգրքի 98-րդ հոդվածի 4-րդ մասի համաձայն՝ որոշումն ուժի մեջ մտնելու օրվան հաջորդ օրվանից ոչ ուշ, քան 10 օրացուցային օրվա ընթացքում վերցված ապրանքները պետք է հանձնվեն ժամանակավոր պահպանման:

4. Որոշման մասին հայտնել Ղ. Ալիզադեհեսալտեհին՝ պարզաբանելով ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ դա կայացնելուց հետո 10 օրվա ընթացքում կամ ՀՀ վարչական դատարան երկու ամսվա ընթացքում:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՅԱԿԱՆՅԱՆ